



EPITAPHIVM DAMONIS.

ARGVMENTV



Thyrsis, & Damon eiusdem viciniae pastores, eadem studia sequuti a pueritia amici erant, ut qui plurimum. Thyrsis animi causa profectus peregre de obitu Damonis nuncium accepit. Domum postea reversus, & rem ita esse comperto, se, suamque solitudinem hoc carmine deplorat. Damonis autem sub personam hinc intelligitur Carolus Deodatus ex urbe Hetruriae Luca paterno genere oriundus, caetera Anglus; ingenio, doctrina, clarissimisque caeteris virtutibus, dum viveret, iuvenis egregius.

A.

DAMON



DAMON.

Imerides nymphæ (nam vos & Daphnin & Hy-
Et plorata diu meministis fata Bionis) (lan
Dicite Sicelicum Thamefina per oppida carmen
Quas miser effudit voces, quæ murmura Thyrsis,

Et quibus assiduus exercuit antra querelis
Fluminaque fontesque vagos, nemorumque recessus
Dum sibi præreptum queritur Damona, neque altam
Luctibus exemit noctem loca sola pererrans.
Et jam bis viridi surgebat culmus arista,
Et totidem flavas numerabant horrea messes,
Ex quo summa dies tulerat Damona sub umbras
Nec dum aderat Thyrsis, pastorem scilicet illum
Dulcis amor Musæ Thusca retinebat in urbe.
Ast ubi mens expleta domum, pecorisque relictæ
Cura vocat, simul assuetâ seditque sub ulmo,
Tum vero amissum tum denique sentit amicum,
Capit & immensum sic exonerare dolorem.

Ite domum impasti, domino iam non vacat, agni.
Hei mihi quæ terris, quæ dicam numina coelo?
Postquam te immiti rapuerunt funere Damon!
Siccine nos linquis, tua sic sine nomine virtus
Ibit, & obscuris numero sociabitur umbris?
At non ille, animas virgâ qui dividit aureâ
Ista velit, dignumque tui te ducat in agmen
Ignavumque procul pecus arceat omne silentium.

Ite domum impasti, domino iam non vacat, agni.
Quicquid erit, certè nisi me lupus antè videbit,
Indeplorato non comminuere sepulcro,

Constabitque

D A M O N.

Constabitque tuus tibi honos, longumque vigebit
Inter pastores, illi tibi vota secundo
Solvere post Daphnin, post Daphnin dicere laudes
Gaudebunt, dum rura Pales, dum Faunus amabit :
Si quid id est, priscamque fidem coluisse, piūque
Palladiāsque artes, fociūque habuisse canorum

Ite domum impasti, domino iam non vacat, agni.

Hæc tibi certa manent, tibi erunt hæc præmia Damon,
At mihi quid tandem fiet modò ? quis mihi fidus
Hærebit lateri comes ut tu sæpe solebas
Frigoribus duris, & per loca fæta pruinis,
Aut rapido sub sole, siti morientibus herbis
Sive opus in magnos fuit eminūs ire leones
Aut avidos terrere lupos, præsepibus altis ;
Quis fando sopire diem, cantuque solebit ?

Ite domum impasti, domino iam non vacat, agni.

Pectora cui credam ? quis me lenire docebit
Mordaces curas, quis longam fallere noctem
Dulcibus alloquiis, grato cūm sibilat igni
Molle pyrum, & nucibus strepitat focus, at malus auster
Miscet cuncta foris, & desuper intonat ulmo

Ite domum impasti, domino iam non vacat, agni.

Aut æstate, diēs medio dum vertitur axe,
Cum Pan æsculeā somnum capit abditus umbrā
Et repetunt sub aquis sibi nota sedilia nymphæ,
Pastoresque latent, stertit sub sepe colonus,
Quis mihi blanditiāsque tuas, quis tum mihi risus
Cecropiosque sales referet, cultosque lepores ?

Ite domum impasti, domino iam non vacat, agni.

At iam solus agros, iam pascua solus oberro
Sicubi ramosæ densantur vallibus umbræ
Hic serum expecto, supra caput imber & Eurus
Triste sonant, fractæque agitata crepuscula silvæ.

D A M O N.

Ite domum impasti, domino iam non vacat, agni.
Heu quàm culta mihi priùs arva procacibus herbis
Involvuntur, & ipsa situ seges alta fatiscit !
Innuba neglecto marcescit & uva racemo,
Nec myrteta juvant, ovium quoque tædet, at illæ
Mærent, inque suum convertunt ora magistrum

Ite domum impasti, domino jam non vacat, agni.
Tityrus ad corylos vocat, Alphefibœus ad ornos,
Ad salices Aegon, ad flumina pulcher Amyntas,
Hic gelidi fontes, hic illita gramina musco,
Hic Zephyri, hic placidas interstrepit arbutus undas ;
Ista canunt surdo, frutices ego nactus abibam.

Ite domum impasti, domino jam non vacat, agni.
Mopsus ad hæc, nam me redeuntem forte notarat
(Et callebat avium linguas, & sydera Mopsus)
Thyrsi quid hoc ? dixit, quæ te coquit improba bilis ?
Aut te perdit amor, aut te malè fascinat astrum
Saturni grave sæpe fuit pastoribus astrum,
Intimaque obliquo figit præcordia plumbo

Ite domum impasti, domino jam non vacat, agni.
Mirantur nymphæ, & quid te Thyrsi futurum est ?
Quid tibi vis ? ajunt, non hæc solet esse juventæ
Nubila frons, oculique truces, vultusque severi
Illa choros, lususque leves, & semper amorem
Iure petit, bis ille miser qui serus amavit.

Ite domum impasti, domino jam non vacat, agni.
Venit Hyas, Dryopæque, et filia Baucidis Aegle
Docta modos, citharæque sciens, sed perdita fastu,
Venit Idumanii Chloris vicina fluenti,
Nil me blanditiæ, nil me solantia verba
Nil me, si quid adest, movet, aut spes ulla futuri.

Ite domum impasti, domino jam non vacat, agni.
Hei mihi quam similes ludunt per prata juvenci

Omnes

D A M O N.

Omnes unanimi secum sibi lege sodales,
 Nec magis hunc alio quisquam secernit amicum
 De grege, sic densi veniunt ad pabula thoes,
 Inque vicem hirsuti paribus junguntur onagri,
 Lex eadem pelagi, deserto in littore Proteus
 Agmina Phocarum numerat, vilisque volucrum
 Passer habet semper quicum sit, & omnia circum
 Farra libens volitet serò sua tecta revisens,
 Quem si fors letho objecit, seu milvus adunco
 Fata tulit rostro, seu stravit arundine fossor,
 Protinus ille alium socio petit inde volatu.
 Nos durum genus, & diris exercita fatis
 Gens, homines, aliena animis, & pectore discors
 Vix sibi quisque parem de millibus invenit unum,
 Aut si fors dederit tandem non aspera votis,
 Illum inopina dies quâ non speraveris horâ
 Surripit, æternum linquens in sæcula damnum.

Ite domum impasti, domino jam non vacat, agni.
 Heu quis me ignotas traxit vagus error in oras
 Ire per aereas rupes, Alpemque nivofam!
 Ecquid erat tanti Romam vidisse sepultam?
 Quamvis illa foret, qualem dum viseret olim,
 Tityrus ipse suas & oves & rura reliquit;
 Vt te tam dulci possem caruisse sodale
 Possem tot maria alta, tot interponere montes,
 Tot sylvas, tot saxa tibi, fluviosque sonantes.
 Ah certè extremum licuisset tangere dextram,
 Et bene compositos placidè morientis ocellos,
 Et dixisse vale, nostri memor ibis ad astra.

Ite domum impasti, domino jam non vacat, agni.
 Quanquam etiam vestri nunquam meminisse pigebit
 Pastores Thusci, Musis operata juvenus,
 Hic Charis, atque Lepos; & Thuscus tu quoque Damon.

D A M O N.

Antiquâ genus unde petis Lucumonis ab urbe.
 O ego quantus eram gelidi cum stratus ad Arni
 Murmura, populeumque nemus, quâ mollior herba,
 Carpere nunc violas, nunc summas carpere myrtos
 Et potui Lycidæ certantem audire Menalcam,
 Ipse etiam tentare ausus sum, nec puto multum
 Displicui, nam sunt & apud me munera vestra
 Fiscellæ, calathique & cerea vincla cicutæ,
 Quin & nostra suas docuerunt nomina fagos
 Et Datis, & Francinus, erant & vocibus ambo
 Et studiis noti, Lydorum sanguinis ambo.

Ite domum impasti, domino iam non vacat, agni.
 Hæc mihi tum læto dictabat roscida luna,
 Dum solus teneros claudebam cratibus hædos.
 Ah quoties dixi, cum te cinis ater habebat,
 Nunc canit, aut lepori nunc tendit retia Damon,
 Vimina nunc texit, varios sibi quod sit in usus;
 Et quæ tum facili sperabam mente futura
 Arripui voto levis, & præsentia finxi,
 Heus bone numquid agis? nisi te quid forte retardat
 Imus? & argutâ paulum recubamus in umbra,
 Aut ad aquas Colni, aut ubi jugera Cassibelauni?
 Tu mihi percurres medicos, tua gramina, succos,
 Helleborumque, humilesque crocos, foliumq; hyacinthi,
 Quasque habet ista palus herbas, artesque medentum,
 (Ah pereant herbæ, pereant artesque medentum
 Gramina, postquam ipsi nil profecere magistro.)
 Ipse etiam, nam nescio quid mihi grande sonabat
 Fistula, ab undecimâ iam lux est altera nocte,
 Et tum forte novis admoram labra cicutis,
 Dissiluire tamen rupta compage, nec ultra
 Ferre graves potuere sonos, dubito quoque ne sim
 Turgidulus, tamen & referam, vos cedite silvæ

Ite

D A M O N.

Ite domum impasti, domino iam non vacat, agni
 Ipse ego Dardanias Rutupina per æquora puppes
 Dicam, & Pandrasidos regnum verus Inogeniæ
 Brennûmque Arviragûmque duces, priscûmque Belinum
 Et tandem Armoricos Britonum sub lege colonos;
 Tum gravidam Arturo fatali fraude Iogernen
 Mendaces vultus, assumptâque Gorlois arma
 Merlini dolus. O mihi tum si vita supersit,
 Tu procul annosa pendebris fistula pinu
 Multûm oblita mihi, aut patriis mutata camænis
 Brittonicum strides, quid enim? omnia non licet uni
 Non sperasse uni licet omnia; mi satis ampla
 Merces, & mihi grande decus (sim ignotus in ævum
 Tum licet, externo penitûsque inglorius orbi)
 Si me flava comas legat Vsa, & potor Alauni,
 Vorticibûsque frequens Abra, & nemus omne Treantæ,
 Et Thamesis meus ante omnes, & fusca metallis
 Tamara, & extremis me discant Orcades undis

Ite domum impasti, domino iam non vacat, agni.
 Hęc tibi servabam lentâ sub cortice lauri
 Hęc, & plura simul, tum quæ mihi pocula Manus
 Manus Chalcidicæ non ultima gloria ripæ
 Bina dedit mirum artis opus, mirandus & ipse,
 Et circum gemino cælaverat argumento:
 In medio rubri maris unda, & odoriferum ver
 Littora longa Arabum, & sudantes balsama silvæ
 Has inter Phoenix divina avis, unica terris
 Cæruleum fulgens diversicoloribus alis
 Auroram vitreis surgentem respicit undis.
 Parte alia Polus omnipatens, & magnus Olympus,
 Quis putet? hic quoque Amor pictæque in nube pharetræ
 Arma corusca faces, & spicula tincta pyropo
 Nec tenues animas, pectûsque ignobile vulgi

Hinc

D A M O N.

Hinc ferit, at circum flammantia lumina torquens
Semper in erectum spargit sua tela per orbes
Impiger, & pronos nunquam collimat ad ictus,
Hinc mentes ardere sacrae, formaeque deorum.

Tu quoque in his, nec me fallit spes lubrica Damon,
Tu quoque in his certè es, nam quò tua dulcis abiret
Sanctaque simplicitas, nam quò tua candida virtus?
Nec te Lethæo fas quæsisse sub orco,
Nec tibi conveniunt lachrymæ, nec flebimus ultrà,
Ite procul lachrymæ, purum colit æthera Damon,
Aethera purus habet, pluvium pede reppulit arcum
Heroùmque animas inter, divosque perennes
Aethereos haurit latices & gaudia potat
Ore Sacro. Quin tu cœli post jura recepta
Dexter ades, placidusque fave quicunque vocaris,
Seu tu noster eris Damon, sive equior audis
Diodotus, quo te divino nomine cuncti
Cœlicolæ norint, sylvisque vocabere Damon.
Quod tibi purpureus pudor, & sine labe juvenus
Grata fuit, quòd nulla tori libata voluptas,
En etiam tibi virginei servantur honores,
Ipse caput nitidum cinctus rutilante corona,
Lætæque frondentis gestans umbtacula palmæ
Aeternum perages immortales hymenæos
Cantus ubi, choreisque furit lyra mista beatis
Festa Sionæo bacchantur & Orgia Thyrsos.

7 JY 57

Londini

FINIS.

